

Perundangan baharu pendidikan tinggi lebih komprehensif ganti AUKU digariskan dalam RPTM 2026-2035 - Zambry

• Oleh Berita Harian , 15 Ogos 2026 @ 4:11pm



PUTRAJAYA: Kerangka perundangan pendidikan tinggi negara yang lebih komprehensif bagi menggantikan Akta Universiti dan Kolej Universiti 1971 (AUKU) telah digariskan dalam Rancangan Pendidikan Tinggi Malaysia (RPTM) 2026-2035. Menteri Pendidikan Tinggi,

Datuk Seri Dr Zambry Abd Kadir, berkata usaha itu adalah sebahagian daripada agenda pembentukan One Higher Education Act yang dilancarkan pada Januari 2026 bagi memperbaharui kerangka perundangan pendidikan tinggi negara.

Beliau berkata AUKU bukan hanya mengawal hal ehwal dan kebebasan mahasiswa, malah menjadi akta induk bagi penubuhan, pentadbiran dan tadbir urus universiti serta kolej universiti. Katanya, kerangka baharu akan dibangunkan secara inklusif dengan mengambil kira pandangan semua pihak berkepentingan bagi memperkukuh autonomi institusi, kebebasan akademik dan suara mahasiswa, di samping memastikan tadbir urus, akauntabiliti serta kecemerlangan institusi pendidikan tinggi terus terpelihara.